

雲南叢書

趙藩題

雲南備考卷六

原任山西武鄉縣知縣臣王崧編纂

故實六

元史本記

元史地理志

元史本紀

明宋濂等撰

憲宗二年秋七月命忽必烈征大理三年九月忽必烈
次忒刺地分兵三道以進冬十二月大理平四年冬大
獵於也滅干哈里义海之地忽必烈還自大理留兀良
合台攻諸夷之未附者入覲於獵所六年雲南酋長麾
合羅嗟及素丹諸國來覲兀良合台討白蠻等克之
世祖壬子夏六月帝入覲憲宗於曲先惱兒之地奉命

帥師征雲南歲癸丑秋八月師次臨洮遣玉律朮王君
候王鑑諭大理不果行九月壬寅師次忒刺分三道以
進大將兀良合台率西道兵由晏當路諸王抄合也只
烈帥東道兵由白蠻帝由中道乙巳至滿陀城留輜重
冬十月丙午過大渡河又經行山谷二千餘里至金沙
江乘革囊及筏以渡摩娑蠻主迎降其地在大理北四
百餘里十一月辛卯復遣玉律朮等使大理丁酉師至
白蠻打郭寨其主將出降其姪堅壁拒守攻拔殺之不
及其民庚子次三甸辛丑白蠻送款十二月丙辰軍薄
大理城初大理主段氏微弱國事皆決於高祥高和兄

弟是夜祥率眾遁去命大將也古及拔突兒追之帝旣入大理曰城破而我使不出計必死矣己未西道兵亦至命姚樞等搜訪圖籍乃得三使尸旣瘞命樞爲文祭之辛西南出龍首城次趙臉癸亥獲高祥斬於姚州留大將兀良合台望戍守以劉時中爲宣撫使與段氏同安輯大理遂班師歲甲寅秋八月至自大理駐桓撫閒復立撫州中統元年六月乙丑以石長不爲大理國總管佩虎符二年三月辛亥遣弓工往教鄯闡人爲弓辛酉以禮部郎中劉芳使大理等國十月庚申賜大理國主段實虎符優詔撫諭之四年八月辛亥置元帥府於

大理命昔撒昔總制鬼國大理兩路兵部郎中劉芳前
使大理至吐番遇害命恤其家至元元年十二月乙丑
以王鑑昔使大理沒於王事其子天赦不能自存優恤
之四年八月丁丑封皇子忽哥赤爲雲南王賜駝鈕金
鍍銀印九月戊申立大理等處行六部以闊闊帶爲尙
書兼雲南王傅柴禎尙書兼府尉寧源侍郎兼司馬庚
戌遣雲南王忽哥赤鎮大理鄯闡茶罕章赤禿哥兒金
齒等處詔撫諭吏民五年九月己丑詔諭安南國陳光
昞來奏稱占城真臘二寇侵擾已命卿調兵與不干併
力征討今復命雲南王忽哥赤統兵南下卿可遵前詔

遇有叛亂不庭爲邊寇者發兵一同進討降服者善爲
撫綏八年二月乙巳大理等處宣慰都元帥寶合丁王
傳闊闊帶等協謀毒殺雲南王火你赤曹楨發其事寶
合丁闊闊帶及阿老瓦丁亦速夫並伏誅賞楨火你赤
及證左人金銀有差五月辛未分大理國三十七部爲
三路以大理八部蠻酋新附降詔撫諭十一月辛酉勅
遣阿魯忒兒等撫治大理十年二月丙申雲南羅羽酋
長阿旭叛詔有司安集其民募能捕斬阿旭者賞之三
月壬申分金齒國爲兩路閏六月丙子以平章政事賽
典赤行省雲南統合刺章鵬赤赤科金齒茶罕章諸蠻

賜銀二萬五千兩鈔五百錠十二年春正月己亥雲南
總管信苴日石買等刺殺合刺章舍里威之爲亂者以
金賞之命土魯至雲南趣阿魯帖木兒入覲以蠻夷未
附者尙多命宣慰司兼行元帥府事並聽行省節度置
郡縣尹長選廉能者任之置雲南諸路規措所以瞻思
丁爲使益衛送唐永堅兵永堅求拜都忙古帶偕行許
之二月乙丑宋福州團練使知特摩道事農士貴率知
那窠州農天或知阿吉州農昌成知上林州農道賢州
縣三十有七戶十萬詣雲南行中書省請降秋七月壬
申簽雲南落落蒲納烘等處軍萬人隸行中書省十三

年春正月辛巳命雲南行省給建都屯軍弓矢丁亥雲南行省賽典赤以改定雲南諸路名號來上又言雲南貿易與中州不同鈔法實所未諳莫若以交會貳子公私通行庶爲民便並從之十五年夏四月丙辰詔以雲南境土曠遠未降者多簽軍萬人進討甲子立雲南湖南二轉運司丁丑雲南行省招降臨安白衣和泥分地城寨一百九所威楚金齒落落分地城寨軍民三萬二千二百所禿老蠻高州筠連州等城寨十九所五月乙未以烏蒙路隸雲南行省仍詔諭烏蒙路總管阿牟置立站驛修治道路其一應事務並聽行省平章賽典赤

節制十六年六月癸巳雲南都元帥愛魯納速刺丁招
降西南諸國愛魯將兵分定亦乞不薛納速刺丁將大
理軍抵金齒蒲驃曲蠟緬國界內招忙木巨木禿等寨
三百籍戶十一萬二百詔定賦租立站遞設衛送軍軍
還獻馴象二十七年二月丁丑答里不罕以雲南行
省軍攻定昌路擒總管谷納殺之詔令答里不罕還以
阿答代之敕非遠方歸附人毋入會同館詔納速刺丁
將精兵萬人征緬國乙酉賞納速刺丁所部征金齒功
銀五千三百二十兩庚子阿里海牙及納速刺丁招緬
國及潤蠻降臣詔就軍前定錄其功以聞五月癸丑詔

雲南行省發四川軍萬人命藥刺海領之與前所遣將
同征緬國冬十月丙子賜雲南王忽哥赤印十八年夏
四月辛未益雲南軍征合刺章五月丙辰以烏蠻蒙阿
謀宣撫司隸雲南行省十九年二月癸巳議征緬國以
大小爲右丞也罕的斤爲參政領兵以行己酉改羅羅
斯宣慰司隸雲南省戊午賜雲南使臣及陝西簽省八
八以下銀鈔衣服有差三月辛酉朔烏蒙民叛敕那懷
火曾思迷率蒙古漢人新附軍討之戊子立塔兒八合
你驛以烏蒙阿謀歲輸驂馬給之八月癸巳發羅羅斯
等軍助征緬國九月己巳籍雲南新附戶自兀良合台

鎮雲南凡八籍民戶四籍民田民以爲病至是令已籍者勿動新附者籍之定雲南稅賦用金爲則以貝子折納每金一錢直貝子二十索罷雲南宣慰司二十年三月丁巳以萬戶不都蠻鎮守金齒乙丑立雲南按察司照刷行省文卷五月丙子詔諭諸王相吾答兒先是雲南重囚令便宜處決恐濫及無辜自今凡大小罪仍須待報併省江淮雲南州郡以耶律老哥爲中書參知政事免戍軍差稅禁諸王奧魯官科擾軍戶以西南蠻夷有謀叛未附者免西川征緬軍令專守禦支錢令各驛供給秋七月庚申調軍益戍雲南丙寅立亦奚不薛宣

慰司益兵戍守開雲南驛路分亦奚不薛地爲三設官
撫治之十一月丁丑禁雲南管課官於常額外多取餘
錢戊寅禁雲南權勢多取債息仍禁沒人口爲奴及黥
其面者十二月丙午罷雲南造賣金箔規措所罷雲南
都元帥府及重設官吏戊申雲南施州子童興兵爲亂
敕參知政事阿合八失帥兵合羅羅斯脫兒世合討之
二十一年春正月己未罷雲南都元帥府所管軍民隸
行省丁卯建都王烏蒙及金齒一十二處俱降建都先
爲緬所制欲降未能時諸王相吾答兒及行省右丞太
卜參知政事也罕的斤分道征緬於阿昔阿禾兩江造

船二百艘順流攻之拔江頭城令都元帥袁世安戍之
遂遣使招諭緬王不應建都太公城乃其巢穴遂水陸
並進攻太公城拔之故至是皆降丁丑雲南諸路按察
司官陞辭詔諭之曰卿至彼當宣明朕意勿求貨財名
成則貲財隨之徇財則必失其名而性命亦不可保矣
夏四月戊申雲南行省爲破緬國江頭城進童男女八
十人併銀器幣帛閏五月乙酉以雲南境內洪城并察
罕章隸皇太子秋七月丁丑朔雲南省臣言騰越永昌
羅必丹民心攜貳宜令也速帶兒或汪總帥將兵討之
制曰可八月丁未雲南行省言華帖白水江鹽井三處

土老蠻叛殺諸王及行省使者調兵千人討之冬十月
戊申四川行省言金齒遺民尙多未附以要刺海將探
馬赤軍二千人討之丁卯以招討使張萬爲征緬招討
使佩三珠虎符二十二年秋七月乙未雲南行省言今
年未暇征緬請收穫秋禾先伐羅北甸等部從之九月
乙亥永昌騰衝二城在緬國金齒間摧圯不可禦敵敕
修之癸巳雲南貢方物烏蒙叛命四川行院也速帶兒
將兵討之冬十月丁卯烏蒙蠻夷宣撫使阿蒙叛詔止
征羅必丹兵同雲南行省出兵討之十二月戊子罷合
刺章打金規運所及都元帥勅合刺章酋長之子入質

京師千戶百戶子留質雲南王也先帖木兒所中書省
臣奏納速丁言減合刺章冗官可歲省俸金九百四十
六兩又屯田課程專人主之可歲得金五千兩皆從之
遣只必哥等考覈雲南行省二十三年二月甲辰以雪
雪的斤爲緬中行省左丞相阿台董阿參知政事兀的
迷失簽行中書省事夏四月庚子敕免雲南從征交趾
蒙古軍屯田租立烏蒙站六月辛酉遣鎮西平緬等路
招討使怯烈招諭緬國壬午給金齒國使臣圓符冬十
月甲寅以征緬功調招討使張萬爲征緬副都元帥也
先鐵木兒征緬招討司達魯花赤千戶張成征緬招討

使並虎符敕造戰船將兵六千人以征緬俾禿滿帶爲
都元帥總之二十四年春正月乙丑復雲南石梁縣秋
七月戊戌樞密院奏簽征緬行省事合撒兒海牙言比
至緬國諭其王赴闕彼言鄰番數叛未易卽行擬遣阿
難答刺奉表齎土貢入覲庚戌雲南行省愛魯言金齒
酋打奔等兄弟求內附且乞入覲八月乙丑以李海刺
孫爲征緬行省參政將新附軍五千探馬赤軍一千以
行召能通白夷金齒道路者張成及前占城軍總管劉
全並爲招討使佩虎符從征以脫滿答兒爲都元帥將
四川省兵五千赴緬省仍令其兵駐緬近地以俟進止

二十五年二月丙寅賜雲南王塗金駝鈕印壬午命皇孫雲南王也先帖木兒帥兵鎮大理等處三月戊子改曲靖路總管府爲宣撫司夏四月庚午賜敕緬中行省比到緬中一稟雲南王節制癸未雲南省右丞愛魯上言自發中慶經羅羅白衣入交趾往返三十八戰斬首不可勝計將士自都元帥以下獲功者四百七十四人甲申詔皇孫撫諸軍討叛王火魯火孫合丹禿魯干五月丙申改雲南烏撒宣撫司爲宣慰司兼管軍萬戶府己亥雲南行省言金沙江西通安等五城宜依舊隸察罕章宣撫司金沙江東永寧等處五城宜廢以北勝施